

ILUARSIISSUT

Siunnersuut ullulernerqartoq 21. august 2009 taarserpaa

(Saqqummiussissummi aaqqiissutinik ilanngussisoqarpoq kiisalu inatsimmi § 8-mi “*immaqalu ernialerlugit*” inatsimmi oqaaseqaatinilu peerneqarput. Taakku saniatigut taamaallaat teknisk-mik aaqqiisoqarsimavoq, siunnersuutip qulequtaa ilanngullugu).

Uunga siunnersuut: Meeqqanut tapiissutit pillugit Inatsisartut inatsisaat nr. xx, xx. qaammat 200x-imeersoq

Kapitali 1

Aalajangersakkat nalinginnaasut

§ 1. Inatsit manna tunngavigalugu meeqqanut tapiissutisisinnaatitaanermi makku piunasaqaataapput:

- 1) meeraq 18-it inorlugit ukioqassasoq,
- 2) meeraq Kalaallit Nunaanni kommunimi innuttaaffeqartuussasoq aamma meeqqanut tapiissutinik tiguisinnaatitaasoq Kalaallit Nunaanni aalajangersimasumik najugaqartuullunilu inuit aqqisa allattorsimaffianni nalunaarsorneqarsimassasoq,
- 3) meeraq meeqqanulluunniit tapiissutinik tiguisinnaatitaasoq qallunaatut innuttaassuseqassasoq, imaluunniit meeraq meeqqanulluunniit tapiissutinik tiguisinnaatitaasoq ukiumi kingullermi Kalaallit Nunaanni najugaqarsimassasoq,
- 4) meeraq meeqqanik inuusuttunillu ikiorsiisarneq pillugu peqqussut tunngavigalugu pisortanit angerlarsimaffiup avataanut inissinneqarsimassanngitsoq imaluunniit pisortanit allatigut pilersorneqartoq aamma
- 5) meeraq katissimassanngitsoq.

Imm. 2. Inunnut Nunat Avannarliit Isumaqaatigiissutaat social sikring pillugu imaluunniit nunat tamalaat isumaqaatigiissutaat allat naapertorlugit isumannaallisaatitut ikiorsiissutinik tiguisinnaatitaasunut meeqqap Kalaallit Nunaanni kommunimi innuttaaffeqartuunissaanik piunasaqaat atuutinngilaq.

§ 2. Meeqqanut tapiissutit meeqqap pilersorneqarnissaanut tunniunneqartarput, meeqqamillu pineqartussaallutik.

Imm. 2. Meeqqanut tapiissutit inummut tapiissutinik pisinnaatitaasumut tunniunneqarnissaannik akiligassaqaqfigisamit malersorneqaataassanngitsoq, utertitsilluni akiliuteqartitsisoqarsinnaanani il.il.

Imm. 3. Meeqqanut tapiissuteqartarnermi ukioq qaammatisiuteqarfiusoq malinneqassaaq.

§ 3. Meeqqanut tapiissutit amerlassusissaat ukiumut meeqqanut tapiissuteqarfiusumut aningaasanut inatsimmi aalajangersarneqartarput, tunniunneqartartussaallutillu ukiumi inaarutaasumik akileraaruteqarfiusumi kingullermi, isertitanut killissarititat aningaasanut inatsimmi aalajangersarneqartut malillugit.

Imm. 2. Angajoqqaat najugaqatigiippata, meeqqamut tapiissutit angajoqqaat katillutik isertitaat akileraaruteqaataasussat aallaavigalugit tunniunneqassapput.

Imm. 3. Meeraq angajoqqaami arlaanni najugaqarpat, meeqqanut tapiissutit tunniunneqassapput taassuma isertitai akileraaruteqaataasussat aallaavigalugit. Angajoqqaq taanna katissimappat imaluunniit aalajangersimasumik inooqateqarpat aappaasup isertitai akileraaruteqaataasussat imaluunniit inooqataasup isertitai akileraaruteqaataasussat naatsorsuutigineqassapput, inooqatigiinneq sivikinnerpaamik ukiumik ataatsimik atasimappat.

Imm. 4. Meeraq assigiimmik angajoqqaami arlaanni najugaqartarpat, angajoqqaamut meeqqap inuit allattorsimaffiannut nalunaarutigineqarami najugaqarfigisaanut, isertitai akileraarutaasussat aallaavigalugit tunniunneqassapput.

§ 4. Inuup uppernarsarsinnaaguniuk, isertitat akileraaruteqaataasussat meeqqanut tapiissutinik tunniussinnermut tunngaviusussat, annertuumik ataavartumillu allannguuteqarsimasut, isertitassatut naatsorsuutigineqartut tunngavigalugu meeqqanut tapiissutinik tunniussissalluni kommunalbestyrelsi aalajangersinnaavoq.

Imm. 2. Ilaqutariit Kalaallit Nunaannut nuuttut, § 1-imi piumasaqaatinik eqqortitsigunik, nuunnermik kingorna qaammammi siullermiit meeqqanut tapiissutinik tunineqarsinnaapput, kommunalbestyrelsip isertitassatut naatsorsuutigineqartunik naliliinera tunngavigalugu.

Imm. 3. Isertitassatut naatsorsuutigisanik naatsorsuisarnermut kiisalu qaqugukkut isertitat ataavartumik annertuumillu appariartarnerat pillugu malittarisassanik Naalakkersuisut aalajangersaasinnaapput.

Kapitali 2

Meeqqanut tapiissutit tunniunneqartarnerat

§ 5. Angajoqqaat najugaqatigiippata, meerarlu taakkunani najugaqarpat, meeqqamut tapiissutit meeqqap arnaanut tunniunneqartassapput, tapiissutit ataataasumut tunniunneqarnissaat isumaqatigiissutigineqarsimatinnagu.

Imm. 2. Meeraq angajoqqaat arlaat najugaqarfigippagu meeqqanut tapiissutit tassunga tunniunneqassapput. Meeraq angajoqqaamini tamani assigiimmik najugaqartarpat, inuit aqqisa allattorsimaffianni meeqqap najugaqarfiatut nalunaarsorneqarsimasumut tunniunneqartassapput.

Imm. 3. Meeraq nammineq aaqqissuussamik ilaqutariinnut inissinneqarsimappat, angajoqqaarsianut tunniussisoqartarnissaanik kommuni aalajangiisinnaavoq.

Imm. 4. Meeraq atuarfimmi najugaqarfiutigisumiippat, efterskolemi taassumaluunniit assigisaani najugaqarpat kommuni aalajangiisinnaavoq meeqqanut tapiissutit tamakkiisumik tamakkiisuunngitsumilluunniit meeqqamut tunniunneqartassasut.

§ 6. Meeqqanut tapiissutit siumut qaammatikkaartumik tunniunneqartassapput.

Imm. 2. Meeqqanut tapiissutit tunniunneqarsinnaanissaannut piumasaqaatit, qaammatip pineqartup ulluani siullermi, eqqortinneqarsimassapput.

Imm. 3. Meeqqanut tapiissutit siullermeerlugit tunniunneqartassapput qaammammi qaammatip tapiissutinik pisinnaatitaalerup tullianit. Kingullermik tunniussineq pisassaaq qaammammi tapiissutinik pisinnaatitaanerup atorunnaarfiani.

Imm. 4. Meeqqap soqutigisaasa pisariaqartitaasalu tamanna pisariaqalersippassuk kommunalbestyrelsi aalajangiisinnaavoq meeqqanut tapiissutit tamakkiisumik ilaannakortumilluunniit nioqutissanik pisissutissanngorlugit tunniunneqartassasut, imaluunniit kommunalbestyrelsip aalajangersagai malillugit aquunneqassasut.

Imm. 5. Meeqqanut tapiissutit tunniunneqartarnerannut malittarisassanik Naalakkersuisut

aalajangersaasinnaapput, tassunga ilanngullugit ukiukinnerusunut tapiissutinik tunniussisarnermi aqutsinermilu malittarisassanik aalajangersaaneq.

Kapitali 3

Aqutsineq, aningaasalersuineq, naammagittaalliuuteqarsinnaaneq il. il.

§ 7. Meeqqanut tapiissutinik tunniussisoqarnissaa kommunip innuttaaffigisap pisussaaffigaa. Qinnuteqartoqaqqaarnani, tunniussisoqartarnissaa kommunalbestyrelsip sulissutigissavaa. Meeqqanut tapiissutit angissusissaasa naatsorsorneranut paasissutissat pisariaqartut pissarsiarineqarnissaat kommunalbestyrelsip pisussaaffigaa.

Imm. 2. Inatsisartut inatsisaat naapertorlugu pisinnaatitaasoq kommunimut allamut nuuppat, kommuni nuuffiusoq paasissutissanik pisariaqartunik kommunimut qimanneqartumut qinnuteqassaaq. Kommuni nuuffiusup kommunillu qimanneqartup akornanni paasissutissat qarasaasiatigut pissarsiarineqarsinnaapput.

§ 8. Meeqqanut tapiissutinik kukkunikkut tunniussisoqanngitsoorsimasoq kommunalbestyrelsip paasippagu ilisimatinneqaruniluunniit, kukkuneq tapiissutinik pisinnaatitaasumiinngippat, meeqqanut tapiissutinik tunniussisoqarnissaanik pisinnaatitaalerfiup aallartinneraniit tunniussisoqassaaq.

Imm. 2. Piumasaqarsinnaaneq pisoqalissaaq pisoqalisut pillugit malittarisassat nalinginnaasut malillugit.

§ 9. Meeqqanut tapiissutinik tigusisartup pisussaaffigaa kommunalbestyrelsimut pissutsinik meeqqanut tapiissutinik naatsorsuisarnermut tunniussisarnermullu pingaaruteqartunik, kiisalu pissutsit taakku allannguuteqarnerinik tapiissutit ikilineqarnissaannut tunniunneqartarunnaarnissaannulluunniit tunngavittut pingaaruteqartunik nalunaaruteqassalluni.

Imm. 2. Meeqqanut tapiissutinik tunniussinissamut tunngavigineqartussanik isertitat akileraaruteqaataasussat pillugit paasissutissanik kommunalbestyrelsi pissarsiniarsinnaavoq.

Imm. 3. Meeqqanut tapiissutinik nalunngereeraluarlugu tigusassarinnngisaminik tamakkiisumik ilaannakortumilluunniit tigusaqartup tigusassarinnngisani kommunimut ingerlaannaq utertissavai, aningaasallu taakku utertinneqartut landskarsimut utertinneqassallutik.

§ 10. Meeqqanut tapiissutinut aningaasartuutit landskarsimit akilerneqartassapput.

Imm. 2. Utertitsilluni akiliisarneq, naatsorsuutininik saqqummiussisarneq, kukkunersuiisarneq aamma nakkutilliisarneq pillugit malittarisassanik Naalakkersuisut aalajangersaasinnaapput.

§ 11. Inatsit manna tunngavigalugu aalajangiinerit isumaginnittoqarfiup aqunneqarnera aaqqissuunneqarneralu pillugit Inatsisartut peqqussutaat malillugu naammagittaalliuutigineqarsinnaapput.

Kapitali 4

Atortuulersitsineq

§ 12. Inatsisartut inatsisaat manna 1. januar 2010-mi atortuulersinneqarpoq.

Imm. 2. Tamatumunnga peqatigitillugu meeqqanut tapiissutit pillugit inatsisartut peqqussutaat nr. 11, 31. oktober 1996-imeersoq atorunnaarsinneqarpoq.

Namminersorlutik Oqartussat, ulloq xx.xx.2009

Kuupik Kleist

/

Maliina Abelsen

